

HEADLINES (EVENING)

1. Champhai ah Hnahsin Kût-2025 chu Chief Minister Pu Lalduhoman wawiin khan a hawng.
2. Aizawl leh Silchar inkar kawngpui leh khawthlang lam Mait kawngpui te lirthei tlan hleihtheih loh khawpa a chhiat avangin, lirthei kalhtuten tlan loh an rel.
3. Wawiin khan ram pahnih aiawhin Prime Minister Narendra Modia leh Mongolia President Khurelsukh Ukhnaa te an inkawm.
4. Union Home Minister Amit Shaha chuan Prime Minister Narendra Modia sawrkar hnuaiah firfiaka chetna lakah ngaihnathiamna engmah an nei lo a ti.

<><><>

HNAHSIN KUT

Champhai ah Hnahsin Kût-2025 chu Chief Minister Pu Lalduhoman wawiin khan a hawng.

Hawna inkhawm Champhai Zotlang Field a neihah thusawiin Chief Minister chuan Hnahsin Kût hman anih atangin Champhai tlawhtu an tam tawh hle a, hnamdang ten Mizoram mawi zia te an rawn hmu a, a ram neitu te zawk, a chengte zawk ten hmang thiam thin lo a, tunah erawh chuan tourism dept lam pawhin nasa takin ãan ala a, a lawmawm hle ani a ti.

Nikum chhung khan Mizoram rawn tlawh tu mi nuai 5 sing 2 vel an awm a chhinchhiah ani a, tunah chuan an sorkar hnuah tlawh tu an nei thar ta thut a, tlawh tu te hi Mizorama cheng zat ve an tling ãep a ni, a ti.

Mizoramah Rêl a lo lut ve ta a hnamdang rawn zin te lo hlauh ngawt tur an ni lo a, ILP an nei a, a lo kal hmasa te chu missionary ah chantir ni se, tlawmngaihna te an rawn hmu tel zel se, state hian hlawkna tam tak an nei thei dawn a ni a ti.

Chief Minister hi Champhai South Bialtu MLA Lt.Col.(Rtd)Clement Lalhmingthanga, MKVI Board Chairman Pu Lalremliana, Champhai DC & SP leh official pawimawh dang ten an ãawiawm a, Hnahsin Kût 2025 hian tun thla ni 17 thleng a awh dawn ani.

<><><>

HIGHWAY ROAD CONDITION WORSEN

Aizawl leh Silchar inkar kawngpui a chhiat nasat leh tawh avangin nimin zing dar 8 leh a chanve atang khan lirthei engmah tlan tir a la ni lova, lirthei tangkhang a tam leh tawh hle a, wawiin atangin Kawnpui atanga Khamrang inkar kawng thawm that tan a ni.

Tunhnai ruahsur avanga Sairang leh Kawnpui inkar kawng siam that hi a chhiat leh nasat tawh em avangin kawng a nal hle a, truck ruak a kal hlei thei lova, nimin atang khan lirthei tangkhang a tam zual a, nimin zing dar 8 leh a chanve atanga khan Assam leh Aizawl inkarah bungraw phur truck leh truck ruak pakhatmah tlan tir a ni lova, lirthei 700 chuanga a tangkhang mek a ni.

Akashvani Aizawl zawhna chhangin ZPM Media General Secretary Pu Jonathan KJ Lalbiaknggheta chuan kawngchhiat leh chhan hi lei nem vang nia an hriat thu sawiin, ruah a sur zawha lei nema bungraw phur truck rit tak tak tlan chuan kawng an rap chhe thin niin an hria a ti a, kawng thawm that nan lung vawm thin bawk mahse a chhe leh mai thin a ti a, rigid concrete pavement in a chhe zual lai siam chu an duh dan a nih rualin NHIDCL hnuaiah defect liability period ah a awm mek a, NH 306 kawng siam lailawk tur hian short term maintenance contract tender an chhuah tawh a ti a, tunhnaia ruahsur nasa avanga kawngchhe zual hi nimin atang khan NHIDCL leh PWD thawk hovin an siamtha leh mek tih a sawi a ni.

Mizoram Truck Drivers' Association President Pu H Laldingliana chuan kawngchhiat avang hian kar 2 kalta atang khan lirthei tangkhang chu zan 3/zan 4 an riak tawh a ti a, nimin tlai thleng khan Khamrang peng thlang kawng chhia atanga Kawnpui bazar thleng bungraw phur truck an ding tawh a ti a, vawiin lama truck ruak tangkhang zat pawh 500 an chuang tawh niin a sawi bawk. Kawng siam tur hian thuneitute chu office lamah dawr reng mahse hmalakna liantham an hmu lo a ti. JAC-in tun thla ni 19 thlenga kawng siam tura an nawr chu an ngaichang phawt ang a, hmalakna a awm loh chuan lirtheia eizawng pawl te chuan na zawka nawr an tum a ti a, he kawng hi chak taka siam a nih theih nan Mizoram sorkar chuan nawr pui se an duh tih a sawi bawk a ni.

Hetihlai hian All NGO Mamit leh Commercial Vehicle Association, Mamit chuan Mamit kawngpui chu a chhiat em avang leh sawrkarin an ngaihthah avangin naktip Ningani atangin Mamit panna kawngpui tiamchin awm lova dan an tum.

All NGO Mamit leh Commercial Vehicle Association, Mamit chuan nizan khan Siamliana Hall, Mamit-a Joint Meeting neiin an thuchhuah tarlan danin Mamit District chak lakna leh veivahna Motor kawngpui pawimawh Mamit atanga Aizawl panna kawng, Mamit leh Bairabi inkar leh Mamit leh Zawlnuam inkar kawngpui chu lirthei eng chi tan pawh kal hleih theih loh khawpa a chhia chu a rang thei ang bera siam tura Mizoram Sorkar an ngenna chu ni 12 thleng khan an ngaichang an ti a, Sorkar hmalakna mumal leh beisei anga hnathawh a awm loh avangin tiamchin awm lovin kawngpui dan an tum thu an sawi a ni.

<><><>

MPCC

Mizoram Pradesh Congress Committee chuan Lengpui Airport chu ZPM kaihhruai sorkarin Indian Air Force kuta hlan an tum chhan an chhuichian hnuah Mizoram hmangaih vang leh Sorkarin a enkawl zawh tawh loh vang ni lovin, sum duh luat vang a ang hle an ti.

He thu hi MPCC spokeperson Pu John Siamkunga chuan vawiin khan Aizawl Press Club-a thuthar thehdarhtute hnenah sawiin, ZPM kaihhruai Mizoram sorkarin Lengpui Airport chu IAF emaw Ministry of Defence emaw kuta hlan a chak em em chhan an chhuichian hnuah IAF chuan Lengpui Airport ram leh Sihphir ram, Sq.ft nuai 50, sang 9,400 a zau chu Compensation cheng vbc19, nuai 87, sing 8, sang 5,155 hmangin an la tawh a, he ram IAF in Compensation hmanga to taka an lak hi, a ram neitu dik takte hnen atangin tu emawin tunhma lam khan a lo lei khawm vek tawh a. Tunah hian Compensation hmanga tihralna hun a hmu ta nia sawi a ni, a ti. A leitu chuan a leisaka te hming ho kha, Compensation Claim nan ala hmang zui thei zel chu thil mak tak a ni bawk tih sawiin, Lengpui Airport IAF kuta hlan tura tih hi Mizoram hmangaih vang ni lovin, Sorkarin a enkawl zawh tawh loh vang pawh ni lovin, sum duh luat vang a ang ta hle zawk a ti.

Pu John Siamkunga Lengpui Airport thlawhna tumkawng Runway atanga lehlam zawng, Terminal Building lo lam, ramhnuai zawng chu IAF in an nei ang tih chuan Chief Minister Pu Lalduhoma chuan a lo sawi tawh a ti a, MPCC chuan Lengpui Airport chu Airport Authority of India (AAI) enkawl tir an duh ber a, Mizoram Airport a nih anga zalen tak leh thlamuang taka mipui ten an hman theiha a awm chu an duh ber a ni tih sawiin, Indian Air Force (IAF), Ministry of Defence kuta hlan an phal ngai dawn lo a ti.

Lengpui Airport IAF kuta dah tura an in hlanchhawn tum dan chu Mizoram tan channa nasa tak a ni dawn tih sawiin, kumin March thlaa Union Home Minister Pu Amit Shah an Aizawl a lo tlawh tum khan Mizoram NGO Coordination Committee hruaitute chuan lo hmu in, Airport Authority of India(AAI) kuta Lengpui Airport dah sak turin an dil a, a ni pawhin AAI in Lengpui Airport an enkawl tur thu lo hrihlin, thla 3 chhungin ruahmanna an peihfel ang a, thla 6 chhungin Airport tih changtlun hna an thawk ang tih a hrih chu ZPM Sorkar in a bawhzui duh si lo a ni a ti a, pawl an tih thu a sawi bawk a ni.

<><><>

AR

Assam Rifles-in fahrah naupangte tan National Integration Tour an buatsaih a kalte chu vawiin khan Assam Rifles HQ 23 Sector, DIG, Brig Pushpendar Sorayan chuan Khatlaa an Headquarters hmun atangin a vailiam.

DIG Brig Pushpendar Sorayan chuan he tour hi naupangte'n an hlawkpui ngei a beisei thu leh naupangte chu an hmun tlawhte leh an thil hmuhte atanga chin dan tha leh hmasawna rawn hawn a, hmang chhonzawm tura a duh thu a sawi a. Zinpuitu turte pawh naupangte him tak leh hlim taka hawnpui turin a chah a ni,

Assam Rifles Civic Action Programme hnuai naktuk ni 15 atanga ni 21 inkara National Integration Tour-a kal turte hi Children's Home, Zokhawsanga enkawl lai mek, kum 11 atanga kum 17 inkar mipa naupang 15 leh zinpuitu tur, Home-a thawktu 2 leh Assam Rifles mi 2, an vaiin mi 18 an ni a. He tour-in a tum chu Mizoram pawna hnam dangte, an hnam zia te, an hnam rohlu leh hmun hlui te hmuhpui a, an khawhawi tihzau niin, Guwahati leh Meghalaya a hmun pawimawh te fanpui an ni ang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

PM

Vawiin khan ram pahnih aiawhin Prime Minister Narendra Modia leh Mongolia President Khurelsukh Ukhnaa te an inkawm. He hunah hian ram pahnihten inremna thuthlung ziakin heng zingah hian mipui harsatna tawk mek puihna lamte, Mongolia-a hmunhlui vawnthat te, mihring pemkualna lama thawhona te, leilung leh mineral tihhmasawn lama thawhdunna bakah digital thil inthleng tawn lamte a tel.

Vawiin vek khan hruaitu pahnihte hian India leh Mongolia inkara thawhdunnain kum 70 a tlin puala stamp siam an tlangzarh bawk a ni.

Thusawiin Prime minister Narendra Modia chuan Idnia chuan Mongolia mipuite tan a thlawnin e-visa siam a remti a ti a. India leh Mongolia inthianthatna chu sawrkar indawrna thil mai niloin thinlung tak taka inpawhna an nei a ni a ti.

<><><>

UNION HM

Union Home Minister Amit Shaha chuan Prime Minister Narendra Modia sawrkar hnuai h firfiaka chetna lakah ngaihnathiamna engmah an nei lo a ti. Vawiina National Security Guard (NSG) din cham vawi 41 naah he thu hi sawiin Pu Shaha chuan firfiakte laka ram venghim turin sawrkarin kawng hrang hrangin hma a la a ti a. NSG hmunpui Haryana-a Manesar-ah he thu hi sawiin Pu Shaha chuan NSG ten ramchhunga pawikhawihna liantham leh firfiaka chetna do kawngah a hmatawng an nih thu a sawi a. Tun dinmunah NSG inkulhna tur hi hmun ruk Mumbai, Chennai, Kolkatta, Hyderabad, Ahmedabad leh Jammu ah te din a ni a. Uttar Pradesh-a Ayodhya ah dah leh tura hmalak mek a nih thu a sawi bawk a ni.

<><><>